

KHUTBAH JUMAAT

“ILMU DIHAYATI, KEMULIAAN DIPEROLEHI”

(9 Januari 2026M/ 19 Rejab 1447H)

الْحَمْدُ لِلَّهِ، الْحَمْدُ لِلَّهِ الْغَنِيِّ الْحَمِيدِ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ
لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Kaum muslimin yang dirahmati Allah,

Marilah kita bersama-sama menjaga diri dengan iman dan takwa. Pastikan setiap tindakan kita selari dengan perintah Allah *subhanahu wata'ala*. Elakkan diri daripada perbuatan yang ditegah-Nya. Mohonlah bantuan daripada Allah *subhanahu wata'ala* dalam setiap urusan harian kita, kerana Allah *subhanahu wata'ala* adalah sebaik-baik penjaga dan Yang Maha Pengasih terhadap hamba-hambanya. Semoga Allah *subhanahu wata'ala* memberikan kita kelapangan hati dan ketetapan iman dalam melayari kehidupan.

Jagalah adab solat Jumaat khususnya ketika khutbah disampaikan. Hindarkan diri daripada bercakap-cakap dan bermain telefon bimbit serta berilah perhatian kepada bicara khutbah yang disampaikan. Mudah-mudahan kita mendapat panduan dan ganjaran pahala yang sempurna. Pada hari ini, khatib akan membicarakan khutbah yang bertajuk "***Ilmu Dihayati, Kemuliaan Diperolehi***".

Muslimin yang dirahmati Allah,

Menuntut ilmu adalah usaha yang sangat mulia. Seseorang yang berusaha dan bersungguh-sungguh menuntut ilmu yang bermanfaat akan mendapat kedudukan yang istimewa di dunia dan di akhirat. Dalam Islam, menuntut ilmu bukanlah sekadar untuk meraih kejayaan di dunia, tetapi ia juga usaha untuk menggapai kejayaan di akhirat dan kebahagiaan di syurga. Imam an-Nawawi *rahimahullah* menukilkan kata-kata hikmah Imam al-Syafie *rahimahullah* di dalam kitabnya *Tahzib al-Asma' wa al-Lughat* yang berbunyi:

"مَنْ أَرَادَ الدُّنْيَا فَعَلَيْهِ بِالْعِلْمِ، وَمَنْ أَرَادَ الْآخِرَةَ فَعَلَيْهِ بِالْعِلْمِ"

Maksudnya: *Sesiapa yang ingin berjaya di dunia, maka hendaklah dia memiliki ilmu. Sesiapa yang ingin berjaya di akhirat, maka hendaklah dia memiliki ilmu.*

Sesungguhnya, ilmu yang dimiliki mampu memotivasikan kita untuk melakukan ketaatan kepada Allah *subhanahu wata'ala*, serta mengamalkan sunnah Rasulullah *sallallahu alaihi wasallam* dalam kehidupan. Dengan ilmu yang diamalkan, akhlak dan peribadi kita akan terpancar dengan kemuliaan, membentuk kita menjadi seorang yang sabar, jujur, bersifat terpuji dan penuh amanah. Ilmu mampu menghindarkan diri kita daripada maksiat dan dosa, serta membezakan antara yang hak dan yang batil, yang halal dan yang haram.

Muslimin yang berbahagia,

Terdapat begitu banyak kebaikan yang akan diperolehi dengan

menuntut ilmu. Antaranya:

Pertama: Allah *subhanahu wata'ala* akan meninggikan derajat seseorang di dunia dan di akhirat kerananya. Firman Allah *subhanahu wata'ala* dalam Surah al-Mujadalah, ayat 11:

... يَرْفَعُ اللَّهُ الَّذِينَ ءَامَنُوا مِنْكُمْ وَالَّذِينَ أُوتُوا الْعِلْمَ دَرَجَاتٍ ...

Maksudnya: ... Allah meninggikan derajat orang yang beriman antara kamu, dan orang yang diberi ilmu pengetahuan agama (dari kalangan kamu) - beberapa derajat ...

Kedua: Allah *subhanahu wata'ala* akan memudahkan jalan kita ke syurga kerananya, dimuliakan oleh para malaikat, dan dimohonkan keampunannya oleh sekalian makhluk Allah *subhanahu wata'ala*. Daripada Abu al-Darda' *radiallahu anhu*, Rasulullah *sallallahu alaihi wasallam* bersabda:

((مَنْ سَلَكَ طَرِيقًا يَطْلُبُ فِيهِ عِلْمًا سَلَكَ اللَّهُ بِهِ طَرِيقًا مِنْ طُرُقِ الْجَنَّةِ. وَإِنَّ الْمَلَائِكَةَ لَتَضَعُ أجنحتها رِضًا لِطَالِبِ الْعِلْمِ. وَإِنَّ الْعَالِمَ لَيَسْتَغْفِرُ لَهُ مَنْ فِي السَّمَوَاتِ وَمَنْ فِي الْأَرْضِ وَالْحَيَاتَانِ فِي جَوْفِ الْمَاءِ. وَإِنَّ فَضْلَ الْعَالِمِ عَلَى الْعَابِدِ كَفَضْلِ الْقَمَرِ لَيْلَةَ الْبَدْرِ عَلَى سَائِرِ الْكَوَاكِبِ. وَإِنَّ الْعُلَمَاءَ وَرَثَةُ الْأَنْبِيَاءِ، وَإِنَّ الْأَنْبِيَاءَ لَمْ يُورَثُوا دِينَارًا وَلَا دِرْهَمًا، وَرَثُوا الْعِلْمَ، فَمَنْ أَخَذَهُ أَخَذَ بِحِطِّ وَافِرٍ))

Maksudnya: *Siapa saja yang menempuh perjalanan untuk mencari ilmu, Allah akan memperjalankannya di atas salah satu jalan Syurga. Sesungguhnya, para malaikat meletakkan sayap mereka kerana reda kepada para penuntut ilmu. Sesungguhnya seorang alim itu dimintakan keampunan oleh makhluk yang ada di langit dan di bumi sehingga ikan yang ada di dasar lautan. Sesungguhnya keutamaan seorang alim atas seorang abid (ahli ibadah) adalah seperti keutamaan bulan purnama atas seluruh bintang-bintang. Sesungguhnya, ulama itu adalah pewaris para nabi. Sesungguhnya para nabi tidak mewariskan dinar dan dirham melainkan ilmu. Kerana itu, siapa saja yang mengambilnya, ia telah mengambil bahagian yang besar.*

(Hadis riwayat Imam Abu Daud)

Ketiga: Tuntutlah ilmu, kerana sesungguhnya Allah *subhanahu wata'ala* akan menambahkan kebaikan kepada orang yang menuntut ilmu. Daripada Muawiyah *radiallahu anhu*, Nabi *sallallahu alaihi wasallam* bersabda:

((مَنْ يُرِدِ اللَّهُ بِهِ خَيْرًا يُفَقِّهْهُ فِي الدِّينِ ...))

Maksudnya: *Sesiapa yang Allah kehendaki kebaikan padanya, maka Allah akan memberinya kefahaman dalam agama.*

(Hadis riwayat Imam al-Bukhari)

Muslimin yang dirahmati Allah,

Perkembangan dunia yang pesat hari ini menuntut kita untuk menceburkan diri dalam ilmu-ilmu baharu. Ia tidak hanya

memperkaya pengetahuan tetapi juga meningkatkan daya saing, mempersiapkan kita untuk menghadapi cabaran masa depan juga sebagai pemeliharaan keselamatan diri. Pentingnya kita untuk mempelajari ilmu baharu seperti kecerdasan buatan (AI), pengkomputeran awan dan sebagainya kerana ia dapat membuka peluang pekerjaan dan inovasi bagi memudahkan urusan kehidupan kita.

Selain itu, dengan menguasai ilmu-ilmu baharu, ia akan meningkatkan daya saing individu di peringkat global dan seterusnya membolehkan kita bersaing di pasaran kerja yang semakin kompetitif dan dinamik. Ilmu-ilmu baharu turut membantu kita untuk menyesuaikan diri dengan perubahan yang berlaku di sekeliling. Adaptasi yang baik ialah kunci kejayaan dalam menghadapi perubahan dan perkembangan.

Maka, perlunya untuk kita terus mencari peluang-peluang latihan dengan mengambil kursus, menghadiri bengkel, dan melibatkan diri dalam program latihan yang tersedia. Banyakkan membaca buku, jurnal, dan artikel terkini dalam bidang yang diminati. Penyelidikan juga penting untuk memahami perkembangan dan inovasi terkini. Selain itu, kita juga boleh menyertai komuniti atau forum dalam talian yang berkaitan dengan bidang yang diminati. Ambil peluang berinteraksi dengan individu yang berpengalaman dan berkongsi pengetahuan bagi mempercepatkan proses pembelajaran.

Muslimin yang berbahagia,

Sesungguhnya, pintu-pintu untuk menuntut ilmu sentiasa terbuka luas di hadapan kita! Masjid dan surau sekeliling kita tidak pernah jemu menganjurkan majlis ilmu setiap hari. Institusi Pendidikan Tinggi (IPT) awam dan swasta seperti universiti, politeknik dan kolej komuniti juga menawarkan pelbagai program pengajian sepanjang hayat, dari peringkat rendah sehingga ke peringkat tertinggi, termasuklah dalam bidang pengajian agama.

Dengan kemajuan teknologi pada masa kini, majlis-majlis ilmu boleh diikuti dengan mudah melalui media cetak, media elektronik, media sosial dan pelbagai kemudahan lain. Maka manfaatkanlah segala peluang yang ada untuk menambah ilmu melalui sumber yang betul dan benar agar tidak terpengaruh dengan dakyah-dakyah palsu dan songsang.

Usahlah biarkan diri kita tenggelam dalam kejahilan, kerana ilmu adalah cahaya yang membimbing kita ke jalan yang direcai Allah *subhanahu wata'ala*. Pastikan juga anak-anak generasi hari ini tidak tercicir dalam pelajaran terutamanya di peringkat awal persekolahan.

Ingatlah, tiada istilah terlewat untuk kita menimba ilmu. Tidak kiralah berapa usia kita, berapa banyak uban yang sudah tumbuh di kepala, berapa banyak garisan halus dan kedutan pada wajah kita, sekalipun mata dan telinga tidak lagi jelas sewaktu usia muda, tidak ada alasan untuk kita berhenti mencari ilmu. Tiada tarikh luput dalam menuntut ilmu.

Oleh itu, marilah bersama-sama kita merebut peluang yang ada untuk menyertai program-program pendidikan yang disediakan kerana ini merupakan peluang yang sangat berharga untuk kita memperkayakan diri dengan ilmu dalam pelbagai bidang, seterusnya menyumbang kepada pembangunan negara.

Muslimin yang dirahmati Allah,

Mengakhiri khutbah, marilah kita bersama-sama mengambil pengajaran dan penghayatan daripada khutbah ini, antaranya ialah:

Pertama: Menuntut ilmu merupakan satu kewajipan ke atas kita semua tanpa mengira usia. Tuntutlah ilmu yang bermanfaat di mana-mana sahaja kita berada, khususnya di masjid, surau dan institusi pendidikan yang berhampiran dengan kita.

Kedua: Didiklah diri kita dengan budaya ilmu supaya dapat dijadikan sebagai contoh teladan yang baik kepada generasi muda kita.

Ketiga: Allah *subhanahu wata'ala* meninggikan darjat kedudukan orang yang berilmu dan mempermudah jalan para penuntut ilmu menuju ke syurga.

Marilah kita bersama-sama menghayati firman Allah *subhanahu wata'ala* dalam Surah az-Zumar, ayat 9:

أَعُوذُ بِاللَّهِ مِنَ الشَّيْطَانِ الرَّجِيمِ. بِسْمِ اللَّهِ الرَّحْمَنِ الرَّحِيمِ.

أَمَّنْ هُوَ قِنْتُ ءَانَاءَ اللَّيْلِ سَاجِدًا وَقَائِمًا يَحْذَرُ الْآخِرَةَ وَيَرْجُوا رَحْمَةَ رَبِّهِ ۗ قُلْ هَلْ يَسْتَوِي الَّذِينَ يَعْلَمُونَ وَالَّذِينَ لَا يَعْلَمُونَ ۗ إِنَّمَا يَتَذَكَّرُ أُولُو الْأَلْبَابِ (٩)

Maksudnya: (Engkaukah yang lebih baik) atau orang yang taat mengerjakan ibadat pada waktu malam dengan sujud dan berdiri sambil takutkan (azab) Hari Akhirat serta mengharapkan rahmat Tuhannya? Katakanlah lagi (kepadanya): “Adakah sama orang-orang yang mengetahui dengan orang-orang yang tidak mengetahui?” Sesungguhnya orang-orang yang dapat mengambil pengajaran dan peringatan hanyalah orang-orang yang berakal sempurna”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ

KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ،
فِيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ.

Kaum muslimin yang dirahmati Allah,

Pada musim hujan ini, khatib menyeru agar kita sentiasa berwaspada dan mematuhi nasihat yang diberikan oleh pihak berkuasa dari semasa ke semasa sama ada yang berkaitan dengan kemungkinan banjir mahupun keadaan perairan untuk apa sahaja aktiviti.

Pada masa yang sama, istiqamahlah mengimarahkan masjid dan surau dengan solat fardu berjemaah dan majlis-majlis ilmu. Bimbinglah ahli keluarga kita agar tetap menjaga solat lima waktu.

Perkukuhkanlah perpaduan dengan sikap saling menghormati dan bekerjasama sesama masyarakat. Inilah asas kestabilan, kemakmuran dan keharmonian Sarawak dan negara kita, Malaysia. Pastikan juga rezeki yang kita perolehi adalah halal lagi baik, kerana makanan yang halal adalah sumber keberkatan hidup. Daripada Abu Hurairah *radiallahu anhu* bahawa Rasulullah *sallallahu alaihi wasallam* telah bersabda:

((أَيُّهَا النَّاسُ إِنَّ اللَّهَ طَيِّبٌ لَا يَقْبَلُ إِلَّا طَيِّبًا ...))

Maksudnya: *Wahai manusia! Sesungguhnya Allah itu Maha Baik, dan Dia tidak menerima melainkan yang baik.*

(Hadis riwayat Imam Muslim)

Hidup beragama bukan hanya pada ibadah, tetapi juga dengan menjauhi perkara yang memudaratkan. Justeru, hendaklah kita menjauhkan diri dan keluarga daripada gejala penyalahgunaan dadah, perjudian dan segala bentuk maksiat. Semua ini hanya membawa kepada kehancuran hidup dan meruntuhkan masa depan kita dan umat.

Pada hari yang mulia ini juga, perbanyakkanlah selawat ke atas Nabi Muhammad *sallallahu alaihi wasallam* seperti yang diperintahkan oleh Allah *subhanahu wata'ala* dalam Surah al-Ahzab, ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

Maksudnya: *Sesungguhnya Allah dan malaikat-Nya berselawat (memberi segala penghormatan dan kebaikan) kepada Nabi (Muhammad sallallahu alaihi wasallam); wahai orang yang beriman, berselawatlah kamu kepadanya serta ucapkanlah salam sejahtera dengan penghormatan yang sepenuhnya.*

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ
عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ
وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ
سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِيِّينَ، سَادَاتِنَا أَبِي بَكْرٍ وَعُمَرَ
وَعُثْمَانَ وَعَلِيٍّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah, Ya Rahman, Ya Rahim, bantulah saudara-saudara kami di mana sahaja mereka berada, khususnya di bumi Palestin. Kurniakanlah mereka perlindungan, keamanan, dan kemenangan. Angkatlah segala penderitaan, kesedihan, peperangan dan permusuhan daripada mereka dengan rahmat-Mu, wahai Tuhan Yang Maha Pengasih.

Ya Allah, Ya Ghaffaar, ampunilah segala dosa-dosa kami, ibu bapa kami, keluarga dan guru-guru kami. Limpahkanlah kepada kami kesejahteraan dan kebahagiaan di dunia dan di akhirat.

Ya Allah, Kurniakanlah kecemerlangan pendidikan kepada anak-anak kami dalam apa sahaja bidang yang mereka ceburi. Tambahkanilah ilmu yang bermanfaat kepada mereka, suburkanlah

jiwa mereka dengan akhlak yang mulia dan terpuji, Jadikanlah anak-anak kami pemimpin dalam kalangan orang yang bertakwa.

Ya Allah, Ya Hadi, Ya Hakim, berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah, Ya Hafiz, Jadikanlah kami umat yang berintegriti, bersatu-padu, dan umat yang terbilang dalam semua bidang yang kami ceburi demi mendukung negara yang maju dan makmur serta mendapat perlindungan-Mu, ya Allah. Kekalkanlah perpaduan kami atas pegangan Ahli Sunnah Wal Jamaah. Limpahkanlah nikmat keselamatan, kesihatan, dan ketenangan, serta lindungilah kami daripada segala musibah, wabak dan bala yang tidak diingini.

اللَّهُمَّ بَارِكْ لَنَا فِي رَجَبٍ وَشَعْبَانَ وَبَلِّغْنَا رَمَصَانَ.
رَبَّنَا أْتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ
يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِكُمْ. وَلَذِكْرُ
اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.